

Wacana Sosial:

Hargailah Nyawa Anda Kempen Keselamatan Jalan Raya



Pada 27 Januari 2008 yang lalu bertempat di Dewan Kapitol UniMAP, Kangar telah berlangsung aktiviti ke 4 di bawah Program Rakan Pendamping Siswa (RPS) – 7 Kursus Wajib Universiti (7 Pillars) iaitu Program Wacana Sosial. Program satu hari ini telah dihadiri oleh 647 orang pelajar tahun 2 program Pengajian Peringkat Ijazah dan 312 orang pelajar tahun 1 dan 2 Program Pengajian Peringkat Diploma.

Program yang dianjurkan oleh PPK Komputer & Perhubungan, PPK Sistem Elektrik, PPK Alam Sekitar dan PPK Bioproses dengan mendapat kerjasama daripada Sekretariat Rakan Pendamping Siswa (RPS), Jabatan Hal Ehwal Pelajar dan Alumni pada kali ini menentang tema "Kempen Keselamatan Jalan Raya – Hargailah Nyawa anda". Tema ini dipilih dalam usaha untuk memberikan kesedaran kepada para mahasiswa & mahasiswi UniMAP khususnya tentang kepentingan terhadap keselamatan jalan raya. Dua orang penceramah telah diundang bagi menayakan program Wacana Sosial ini, mereka adalah ASP Rusli bin Yahaya, dari Polis Cawangan Trafik IPK Kangar dan Encik Khairul Amin bin Talib dari Jabatan Keselamatan Jalan Raya. Di samping ceramah yang dijalankan, pihak PDRM dan Jabatan Keselamatan Jalanraya juga membuka ruang pameran di ruang legar Dewan Kapitol UniMAP.

Majlis Perasmian bagi Program Wacana Sosial pula telah dihadiri oleh Yang Berbahagia Prof. Dr. Zul Azhar Zahid bin Jamal, Timbalan Naib Canselor (Penyelidikan dan Inovasi) yang mewakili Yang Berbahagia Dato' Naib Canselor UniMAP. Turut hadir bersama selain daripada 2 orang penceramah jemputan adalah Yang Berusaha Prof. Madya Dr. R. Badlishah bin Ahmed, Dekan PPK Komputer dan Perhubungan, Prof. Madya Zaliman bin Sauli, Dekan PPK Mikroelektronik, dan beberapa orang lagi Dekan dan Ketua Jabatan.

Kemuncak kepada Majlis Perasmian dan Program Wacana Sosial ini adalah upacara pelepasan konvoi "Kempen Keselamatan Jalan Raya – Hargailah Nyawa Anda" yang terdiri daripada seramai 69 orang penunggang motorsikal yang akan singgah di beberapa tempat dan kemudiannya akan menyebarkan risalah-risalah berkaitan dengan keselamatan jalan raya. Upacara pelepasan ini telah dilakukan oleh Yang Berbahagia Prof. Dr. Zul Azhar Zahid bin Jamal.

